



# Atak na vladavinu prava

Apel Parlamentu BiH da što prije usvoji izmjene i dopune Zakona o krivičnom postupku, usklađene sa odlukom Ustavnog suda BiH i međunarodnim standardima

Nasjednici Ustavnog suda Bosne i Hercegovine održanoj 1. juna 2017. godine donijeta je Odluka u predmetu U-5/16 u kojoj stoji da pojedine norme Zakona o krivičnom postupku Bosne i Hercegovine nisu u skladu sa odredbama Ustava Bosne i Hercegovine. U navedenoj odluci Suda naloženo je Parlamentarnoj skupštini BiH da uskladi navedene odredbe i obavijesti Sud najkasnije u roku od 6 mjeseci.

**Inicijativa za monitoring evropskih integracija** u BiH kao neformalna koalicija organizacija civilnog društva koja u svom radu veliki fokus stavlja na pitanja vladavine prava i zakonitosti ovim putem apeluje na članove Parlamentarne skupštine BiH da u što kraćem roku usvoje izmjene i dopune Zakona o krivičnom postupku koje će biti usklađene sa odlukom Ustavnog suda BiH, ali i međunarodnim standardima te omogućiti sudovima i tužilaštvima da se objektivno, nesmetano i zaštićeno bore protiv kriminala i korupcije.

Podsjećamo da je Ustavni sud Bosne i Hercegovine na 109. plenarnoj

sjednici 22. marta 2018. odgodio izvršenje svoje odluke u ovom predmetu, čime su parlamentarci dobili još malo vremena za izglasavanje adekvatnih amandmana kojim će izbjeći stanje pravne nesigurnosti i ugrožavanje niza optužnica Tužilaštva BiH.

Sporne odredbe Zakona su član 84. stavovi 2, 3 i 4; član 117. tačka d); član 118. stav 3.; član 225. stav 2.; član 226. stav 1. i odnose se na pitanja davanja imuniteta svjedocima, posebne istražnje radnje (za koja krivična djela se mogu odrediti te određivanje i trajanje istih) te trajanje i podizanje optužnice. S tim u vezi, apelujemo na izmjene i dopune Zakona koje će:

- U potpunosti precizno odrediti davanje imuniteta svjedoku, pri čemu se izbjegava mogućnost arbitrarnog odlučivanja tužioca o ovom pitanju, te jasno definisati i poštovati podijeljenost funkcije gonjenja i presuđivanja (između tužilaštva i suda) u postupku dodjeljivanja imuniteta svjedoku.

- Poštovati član 8. st. 2. Evropske konvencije o ljudskim pravima na način da se miješanje države u prava pojedinaca ostvaruje isključivo u skladu sa zakonom, vladavinom

prava te srazmjernosti i legitimnosti cilja koji se želi postići primjenom posebnih istražnih radnji.

- Poštovati međunarodne standarde i evropsku sudsku praksu na način da se uslovi i određivanja i trajanja posebnih istražnih radnji jasno odrede i ukloni mogućnost arbitarnosti.

- Poštovati pravo na pravično suđenje zagarantovano Evropskom konvencijom o ljudskim pravima i Ustavom BiH, odnosno, pravo na razumno trajanje krivičnog postupka, pravo na odbranu i provođenje brze i efikasne istrage na način da se jasno odrede rokovi u kojim je tužilac obavezan podići optužnicu, mogućnost prigovora osumnjičenog na trajanje istražnog postupka te jasno definiše trajanje istražnog postupka i njegovo eventualno produženje.

Podsjećamo da su se o ovom pitanju oglasile i ambasade Francuske, Njemačke, Italije, Holandije, Španije, Ujedinjenog Kraljevstva i SAD-a, iskazujući veliku zabrinutost zbog nerješavanja i politizacije ovog prevashodno pravnog pitanja.

**INICIJATIVA ZA MONITORING EVROPSKIH INTEGRACIJA U BiH**



Cekaju se parlamentarci / AMER KAJMOVIĆ